

**PERJUANGAN AGAMA, BANGSA DAN NUSA: KAJIAN
TERHADAP TIGA AKHBAR MELAYU DI SARAWAK**
***THE STRUGGLE OF RELIGION, NATION AND STATE: A STUDY
ON THE THREE MALAY NEWSPAPERS IN SARAWAK***

NORDI ACHIE

Pusat Penataran Ilmu dan Bahasa, Kampus Antarabangsa Labuan,

Universiti Malaysia Sabah, 87000 Labuan, W.P. Labuan

Corresponding author: nordi@ums.edu.my

Tarikh dihantar: 18/3/2021 / Tarikh diterima: 20/6/2021 / Tarikh terbit: 22/12/2022

DOI: <https://doi.org/10.51200/ejk.v28i1.4174>

Abstrak Kertas ini bertujuan mencerakinkan peranan kristalistik dan sumbangan vitalistik *Fajar Sarawak* (1930), dalam kancang zaman keangkuhan kolonialisme Barat dan sadisme dunia Melayu-Islam, merentasi garis zaman pancaroba yang besar iaitu Perang Dunia Pertama dan Kedua. Pada zaman inilah, muncul perjuangan keulamaan di Sarawak *Darul Hana* yang bangkit menyanggah terorisme Barat dan memercukan gagasan kemajuan Melayu-Islam, dengan pena dan tinta sebagai senjata perjuangan keulamaan. Persoalannya, mengapakah angkatan *Fajar Sarawak* teguh menggeluti zaman yang penuh berisiko dewasa itu? Menerusi wacana kerdil ini, penulis akan menggarap gagasan dan perjuangan *Fajar Sarawak* (1930) sembari menelusuri garis persamaan dan perbezaan penting (secara menyeluruh) dengan *Utusan ASAS* (1947-1948) dan *Utusan Sarawak* (1949-1950) secara komparatif, dalam konteks inklusivisi perjuangan keulamaan sezaman. Struktur wacana ini dibahagikan kepada tiga tema utama (ikuti pemerihalan selanjutnya). Bagaimanapun, aspek latar belakang masyarakat tidak disentuh di sini kerana ruangan yang terhad, malah keutamaan harus diberikan terhadap aspek pengisianya. Begitu juga dengan kesan perjuangan akhbar Melayu, topik ini memerlukan kertas berasingan.

Kata Kunci: Akhbar, ulama, politik.

Abstract The purpose of this paper is to elaborate on the vital roles and core contributions of *Fajar Sarawak* (Malay newspapers in Sarawak), within the Western colonialism era in the Malay world, between the two world war eras (1941-1945). In this critical era, the Muslim scholars in Sarawak struggled firmly in insisting the so-called international terrorist aggression (Western

colonialists) and devotionally boosted the ideas of Malay progression, via the intellectual discourse as well. The interesting question is why did they (as the ideas raised in the Malay newspapers) bravely opposed Western colonization, in spite of the different perspectives and approaches? The most essential aspect in this article will be focused on the Islamic struggle and aspirations of Fajar Sarawak, Utusan Asas, and Utusan Sarawak, in comparative perspectives as a whole. Hence, the structure of this article will be divided into three main themes. However, there are two aspects that will not be mentioned here; the background of the society in the respective eras and the impacts of the Malay newspapers struggle towards its nation as those topics need to be examined in other articles.

Keywords: *Newspaper; Muslim scholars, politics.*

PENGENALAN

Fajar Sarawak, Utusan ASAS dan *Utusan Sarawak* merupakan akhbar Melayu perjuangan tiga serangkai yang berperanan penting sebagai jurubicara reformis Islam dan nasionalis Melayu progresif di Sarawak, merentasi era dua perang dunia. Bagi memahami perjuangan keulamaan *Utusan ASAS* (*UA*) dan *Utusan Sarawak* (*US*), semua pencitraan *UA* dan *US* harus digabung jalinkan dengan *Fajar Sarawak* (*FS*). Terdapat dua asas penting yang mendasari pertimbangan ini. Pertama, perjuangan *UA* dan *US* beruratakan perjuangan *FS*. Kedua, peranan *US* sebagai penerus perjuangan *UA* dan pelengkap perjuangan *FS*. Oleh itu, *US* wajar diketengahkan dalam perbincangan ini. Ia bertujuan melihat setakat mana gagasan serta pemikiran *FS* dan *UA* berangkaian atau tersisih daripada arus perjuangan *US*. Begitu juga dengan perkaitan antara *FS* dan *UA*. Perlu dinyatakan, skop penelitian *US* dikhaskan untuk tempoh awal penerbitannya (1949-1950). Ia merupakan tempoh kritikal pada awal era pemerintahan kolonial British di Sarawak (1946-1950). Persoalannya, apakah perjuangan keulamaan yang terpancar menerusi gagasan Islamik *Fajar Sarawak*?

RANGKUMAN GAGASAN, RANGKAIAN GERAKAN

Sejak awal 1930-an, *FS* telah menghembuskan roh pemikiran antikolonialisme Barat, dan selepas tamatnya era Perang Dunia Kedua, muncul pula *UA* (seterusnya *US*) sebagai pembakar api nasionalisme Sarawak. Lebih sedekad sebelumnya, *FS* telah menyajikan pelbagai pemikiran bernes (baja renungan dan benih pengajaran) untuk menyedarkan puterabumi Sarawak mengenai hak, kepentingan dan masa depan mereka, sebagai pemilik asal dan pemilik tunggal Bumi Kenyalang. Gagasan dan perjuangan akhbar-akhbar ini bermuarakan kepentingan kolektif puterabumi Sarawak yang berbilang agama, bahasa dan budaya, namun hakikatnya mereka serumpun, setanah dan selangit (hidup di bawah payungan langit yang sama).

Kritikan *FS* terhadap ancaman dan bahaya kolonialisme James Brooke tersirat melalui rencana sejarah yang ditulis oleh Rakawi Yusuf. Sekalipun ada kalanya kedengaran memuji Vyner Brooke, ini bukanlah bermakna *FS* bersekongkol dengan regim Brooke kerana Brooke merupakan kolaborator penjajah British. *FS* menyedari puterabumi Sarawak menjadi mangsa “politiking” regim Brooke (*Fajar Sarawak*, 1 Februari-16 Jun 1930). Walaupun pemikiran antikolonialisme *FS* tidak begitu menonjol (berbanding *UA* dan *US*), tetapi ia menjadi bukti bahawa pemikiran antikolonialisme bukanlah bendasing dalam wacana kepolitikan di Sarawak sejak awal 1930-an. Pemikiran antikolonialisme yang disemai *FS*, disembur *UA* dan disemarak *US*. *UA* berperanan penting menyulut pemikiran antikolonialisme dalam kemelut isu penyerahan Sarawak (*Utusan Asas*, 10 Oktober-15 Disember 1947). Suaranya lantang dan nadanya garang berbanding *FS*. *UA* memperjuangkan gagasan kemerdekaan pasca-Perang Dunia Kedua buat julung kalinya dalam sejarah Sarawak, pada peringkat awalnya (1947-1948). Hal ini bertepatan dengan kedudukan *UA* sebagai akhbar Melayu pertama yang diterbitkan ketika itu dan peranannya sebagai suara bitara patriot Sarawak.

US merupakan wadah utama yang terus menyalakan pemikiran dan semangat antikolonialisme pasca-*UA*. *US* memperlihatkan komitmennya menentang penjajahan British dan menuntut kemerdekaan tanah air. Reaksi pembaca terhadap isu penyerahan dan penjajahan Sarawak kian panas. Kritikan mereka semakin berani dan tajam, sekali gus memanifestasikan

kebencian memuncak terhadap kolonialisme (*Utusan Sarawak*, 16 Januari 1949-13 November 1950). Biarpun kerajaan kolonial British bersikap egois dan memandang enteng kebangkitan nasionalisme Sarawak (taktik perang saraf terhadap patriot), tetapi sikap acuh tak acuh pihak penjajah gagal menyekujinginkan semangat antipenjajahan, malah pengaruh perjuangan kemerdekaan ini semakin merebak ke seluruh negeri (senjata makan tuan).

Pemikiran reformisme Islam turut melebarkan sayap pengaruhnya merentasi dua zaman: sebelum dan selepas Perang Dunia Kedua. Gagasan yang dicetuskan oleh majalah *al-Imam* (suara reformis Islam) di Tanah Melayu sejak 1908, jelas mempengaruhi orientasi perjuangan akhbar Melayu di Sarawak (Nordi, 2003). Pada prinsipnya, ketiga-tiga akhbar ini merupakan penjana arus pemikiran reformisme Islam di Bumi Kenyalang. Bagaimanapun, isu-isu ranting yang pernah diperdebatkan antara Kaum Muda dengan Kaum Tua di Tanah Melayu, jelas tidak menarik perhatian *FS*, *UA* dan *US* kerana keremehan isu itu sendiri. Pengaruh pemikiran reformisme Islam yang dirintis *FS*, terus meresapi pemikiran dwiakhbar berikutnya (*UA* dan *US*).

FS menampilkan obor pemikiran progresisme (idea progresisme Islamik) demi kemaslahatan puterabumi Sarawak. Ketika itu, mereka masih jauh ketinggalan berbanding gerakan dan perjuangan progresisme di Tanah Melayu dan Indonesia. Atas kesedaran ini, *FS* menentang adat dan amalan anakronistik yang memborgol kehidupan puterabumi Sarawak. *FS* mahu putera Bumi Kenyalang bangkit bersatu membebaskan diri mereka daripada semak-samun kemunduran dengan membasmikan putaran ganas kemiskinan hidup. *FS* sedar kemajuan anak watan dan tanah air terletak atas kemandirian pendidikan dan ekonominya sendiri. Kesedaran ini menyebabkan *FS* membela hak dan kepentingan anak negeri kerana nasib dan masa depan watan terkandar di bahu mereka. *FS* menegaskan tindakan positif dan konstruktif harus dilaksanakan segera untuk memperbaiki taraf hidup puterabumi secara holistik, membabitkan tiga pihak serentak iaitu Raja Putih, pembesar puterabumi dan rakyat seluruhnya (*Fajar Sarawak*, 1 Februari-16 Jun 1930).

Islam merupakan wasilah definatif yang menghunjami gagasan dan perjuangan *FS*, *UA* dan *US*. Walaupun akhbar-akhbar ini tidaklah mewacani ideologi politik Islam atau teori politik Islam, tetapi nilai-nilai siasah Islam

dipancarkan dengan jelas, malah Islam dijunjung sebagai agama progresif, bukannya agama yang diperagamakan (agama pada nama dan agama sebagai upacara). Umat Islam di Sarawak dewasa itu hanya menganut agama Islam, namun mereka belum mengarifi hakikat Islam itu sendiri. Dalam konteks ini, kembali kepada Islam bermakna kembali menghayati Islam sebagai kunci kemajuan (*ummatan* dan *watan*), tetapi bukanlah dengan cara berkiblatkan Barat secara membuta tuli (*Fajar Sarawak*, 1 Februari-16 Jun 1930). Islam tidak harus dilihat dalam ruang lingkup kejumudan. Islam mencakupi tridimensi kehidupan: perajutan dengan bumi (manusia dan alam), serta persendian dengan langit (hubungan dengan Tuhan Maha Esa). Inilah keunikan Islam kerana seluruh hidup umatnya merupakan ibadah. Justeru, jihad menentang kemunduran dan jihad menggapai kemajuan merupakan tuntutan Islam.

Dalam konteks perpaduan Melayu-Muslim, Islam dimercukan sebagai teras pemersatu, berlunaskan al-Quran dan sunah Rasulullah. Islam menegah perpecahan dan permusuhan: dikotomisasi mikro (sesama saudara seagama) maupun makro (sesama saudara semanusia). Dalam Islam, seluruh manusia bersalasilahkan genetik Adam, manakala seluruh Muslim pula dipersaudarakan sebagai bani tauhid. Kedua-dua bani insani ini diikat dengan tali silaturahim manusawi sejagat. Lantas, *FS* mengajak umat Islam di Sarawak *Darul Hana* bersatu (dalam semua urusan duniaawi) tanpa mengira darjat kebangsawan dan darah keturunan (*Fajar Sarawak*, 1 Februari-16 Jun 1930). *UA* pula menentang perpecahan dalam perjuangan menentang berhalza zaman moden iaitu kolonialisme Barat. *UA* sedar seluruh puterabumi perlu berhijrah, dengan membebaskan diri mereka daripada cengkaman kemiskinan ilmu, harta dan jiwa (*Utusan Asas*, 10 Oktober-15 Disember 1947). *US* pula menegaskan kepentingan mendamaikan persengketaan berlarutan sesama Melayu-Muslim akibat permusuhan antara penyokong dan penentang penyerahan Sarawak (*Utusan Sarawak*, 16 Januari 1949 - 13 November 1950). Kesemuanya berjihad dengan mengibarkan panji perpaduan ummah. Ia ditegakkan dengan kesatuan ukhuwah dan akidah Islamiah. Inilah gagasan politik reformisme Islam yang dicerap *FS*, dicanai *UA* dan dicerakin *US*.

Pada dasarnya, kesemua akhbar ini menekankan kepentingan pendidikan duniaawi dan agamawi kerana ilmu merupakan graha kemajuan,

malah menuntut ilmu merupakan kewajipan terhadap setiap Muslim justeru, setiap Muslim yang sengaja mengabaikan ilmu, mereka dihukumkan berdosa. Sungguhpun demikian, senario dunia sezaman memperlihatkan keliaran nafsu manusia kolonialis (Nordi, 2013); bangsa-bangsa Barat menguasai ilmu dan teknologi, tetapi kemajuan itu pula disalahgunakan untuk menjajah bangsa-bangsa Timur. Ini bukanlah konsepsi ilmu insani, sebaliknya konsepsi ilmu haiwani. *FS*, *UA* dan *US* menerima kemajuan ilmu Barat, namun mereka menentang korupsi dan intimidasi ilmu, seperti dilakukan oleh kuasa-kuasa kolonial Barat. Dalam pada itu, Islam menggagaskan emansipasi (pembebasan) wanita daripada segala bentuk penindasan. Buktinya, Islam membela hak dan keadilan wanita dalam semua aspek kehidupan. Hak dan keadilan inilah yang disuarakan oleh *FS*, *UA* dan *US*.

Antara hakikat sezaman yang paling mendukacitakan ialah kemiskinan ekonomi umat Islam. Masalah getir ini pernah disuarakan dengan lantang dan jujur oleh mujahid reformis Islam di Nusantara (menerusi majalah *al-Imam*). Gagasan dan gerakan ini diteruskan oleh *FS*, *UA* dan *US* sekalipun mereka tidak menamakan diri mereka sebagai reformis Islam. Ada apa dengan nama? Yang penting bukanlah gelaran, tetapi pengisian dalam perjuangan. Mereka menampilkkan ketercerahan perspektif dalam menggarap gagasan ini. Pertama, mengenal pasti puncanya secara tuntas. Kedua, mengemukakan langkah yang mangkus untuk membasminya. Kemiskinan ekonomi merupakan masalah rumit dan ruwet yang berakar umbi lebih 300 tahun lamanya (sejak kerajaan-kerajaan rumpun Melayu dihancurkan oleh penjajah Barat pada awal abad ke-16), dan penyakit duniawi ini mustahil dapat dirawat dalam sekelip mata. Betapapun sukarnya, semua kejayaan bermula dengan langkah pertama iaitu perubahan dalaman: rakyat, pemimpin dan pemerintah (Nordi, 2013), bukan terperangkap dengan ciri-ciri luaran yang memperdayakan (Nordi, 2018: 223-242; Nordi, 2020: 205-208).

Walaupun menyedari kekayaan negerinya sedang dibolot oleh bangsa penjajah dan bangsa dagang, tetapi cabaran paling getir yang dihidapi puterabumi Kenyalang ialah wabak putus asa, putus harapan dan putus jalan. *FS*, *UA* dan *US* sangat menginsafi kebenaran pahit ini. Mereka hanya mempunyai satu pilihan iaitu mengubah sikap dan nasib mereka sendiri (*Fajar Sarawak*, 1 Februari-16 Jun 1930), sebaliknya menyalahkan bangsa penjajah

dan bangsa dagang semata-mata, sikap negatif ini tidak akan mengubah apa-pun. Jelas, akhbar-akhbar ini berpasak di landasan yang benar, dengan perspektif yang tepat dan suara hati yang jernih. Dengan ini, kejayaan bangsa penjajah dan bangsa dagang dijadikan sebagai iktibar kemajuan secara kritis dan konstruktif (*Utusan Sarawak*, 16 Januari 1949-13 November 1950); dengan mengambil ingatan, mereka tidak akan berdiam diri apabila melihat hak dan kepentingan puterabumi di tanah air mereka sendiri dinistakan (*Utusan Asas*, 10 Oktober-15 Disember 1947). Ambil yang jernih, buang yang keruh.

ARUS DAN DAN ARAH PERJUANGAN ISLAMIK

FS dan *UA* diasaskan oleh dua tokoh yang sama, iaitu Johari Anang dan Abdul Rahman Kassim. Kedua-duanya merupakan tokoh yang mengasaskan akhbar Melayu dalam dwizaman: pra dan pasca-Perang Dunia Kedua. Ikhwan pula merupakan pengasas dwiakhbar pasca-Perang Dunia Kedua iaitu *UA* dan *US*. Ikhwan dibantu oleh Johari dalam sidang pengarang *UA* dan *US*. Abdul Rahman Kassim, biarpun beliau merupakan antara pengasas *FS* dan *UA*, tetapi beliau bukanlah pengasas *US*. Dalam konteks sejarah penerbitan *FS*, *UA* dan *US*, Johari merupakan pengasas ketiga-tiga akhbar ini. Beliau merupakan tokoh pengasasan akhbar merentasi dwizaman dalam lembaran sejarah akhbar Melayu di Sarawak. D sinilah terpaterinya ketersohoran Johari. Beliau telah membidani pengasasan dan kemunculan *FS*, *UA* serta *US*.

FS, *UA* dan *US* diterbitkan ketika puterabumi Sarawak miskin dan mundur dalam semua aspek kehidupan. Bangsa dijajah. Nusa dijarah. Hak dan kepentingan mereka kian terancam angkara kebobrokan kolonialisme dan keserakahhan kapitalisme. Pemimpin Melayu pula berlepas diri daripada nasib malang yang tertimpa ke atas anak negeri (*Fajar Sarawak*, 1 Februari-16 Jun 1930). Sementara itu, *UA* dan *US* diterbitkan semasa histeria politik melanda Sarawak iaitu ketika isu penyerahan Sarawak sedang memuncak. Ketika itu, patriot Sarawak memerlukan akhbar untuk menyuarakan penentangan mereka terhadap penjajahan. Lantaran itu, tidaklah menghairankan mengapa *UA* dan *US* berani menyelar kerajaan kolonial British dan tali barut penjajah dengan tajam menikam (*Utusan Sarawak*, 16 Januari 1949-13 November 1950).

Pada dasarnya, *UA* merupakan senjata perjuangan Angkatan Semangat Anaknegri Sarawak (ASAS) dan patriot antipenyerahan Sarawak. Sebagai propagandis ASAS, *UA* bukanlah akhbar bebas dan berkecuali. Ia belum bercitra akhbar kebangsaan Sarawak. Suasana kritikal yang benar-benar mendasari penerbitan *UA* ialah isu politik. Kemudian, pertimbangan ekonomi dan sosial. Betapapun demikian, kemuncaknya ialah demi membela maruah bangsa dan martabat nusa. Ketika itu, mata dan telinga puterabumi Sarawak, khasnya masyarakat Melayu, terpukau dengan isu penyerahan Sarawak. Ia merupakan isu politik yang paling menggemparkan Sarawak selepas tamatnya era pendudukan tentera imperialis Jepun. Hampir seluruh perhatian, masa dan tenaga *UA* dijuruskan untuk mewacanai isu politik (*Utusan Asas*, 10 Oktober-15 Disember 1947). Hal ini bertepatan dengan motto *UA*: “Rakyat yang mengetahui [kebenaran] ialah [benteng] keselamatan negara”. Motto *UA* bercitra kepoltikan – oleh politik, dari politik dan untuk politik (*Utusan Asas*, 10 Oktober-15 Disember 1947).

Meskipun *FS* tidaklah muncul dalam situasi politik kontroversial, tetapi gagasan dan landasan perjuangan politik akhbar ini terpancar menerusi pelbagai isu politik yang disentuhnya. Ia memancarkan citra politik *FS* sebagai jurubicara nasionalis progresif. Fakta ini sukar disangkal. Sungguhpun motto *FS* bercitra sederhana, “Perkhbaran Am, Pengetahuan, Pengajaran dan Penghiburan”, tetapi *FS* menujahkan gagasan futuristik dalam perjuangannya iaitu gerakan progresisme (kemajuan holistik) puterabumi Sarawak. Sementara itu, motto *US* iaitu “OLEH RA’AYAT UNTOK RA’AYAT” memperlihatkan aspirasi unggul akhbar ini untuk menjadi akhbar kebangsaan Sarawak (*Utusan Sarawak*, 16 Januari 1949-13 November 1950). Cakupan motto *US* lebih luas berbanding motto *UA*, dan motto *US* lebih mendekati motto *FS* iaitu “Perkhbaran Am, Pengetahuan, Pengajaran dan Penghiburan” (*Fajar Sarawak*, 1 Februari-16 Jun 1930). Bagaikan sirih pulang ke gagang.

Sebagai media massa yang memancarkan citra dan menyemarakkan cita perjuangan bersifat kebangsaan Sarawak, *US* bertekad untuk menjadi jurubicara seluruh rakyat Sarawak, tanpa mengira ideologi politik. Hala tuju dan matlamat perjuangannya dipotretkan untuk kepentingan agama, bangsa dan nusa (*Utusan Sarawak*, 16 Januari 1949-13 November 1950). Hakikat inilah yang menjelaskan kenapa *US* mampu bertahan sekalipun gerakan

antipenyerahan Sarawak berjaya dilumpuhkan oleh kerajaan kolonial British (dengan kekerasan dan undang-undang) pada 1950. Nyatalah *US* masih dan tetap diperlukan kendatipun era perjuangan antipenyerahan Sarawak sudah berakhir (1946-1950). *US* terus memperjuangkan gagasan kemerdekaan dan progresisme puterabumi Sarawak. Selain itu pencabulan kemerdekaan nusa dan maruah kedaulatan bangsa, *US* sangat prihatin dengan tanggungjawab untuk membela hak, nasib dan masa depan puterabumi Sarawak. Gagasan murni ini merupakan perjuangan lestari dan kritikal *US* merentasi era pascakemerdekaan Sarawak.

Bagaimanapun, akibat suasana politik semasa, berita dan karya (rencana, surat dan sajak) yang tersiar menerusi *US* kelihatan kesemuanya (atau kebanyakannya) hasil daripada sumbangan golongan antipenyerahan Sarawak. Natijahnya, pihak propenyerahan amat jarang menyuarakan fikiran mereka menerusi *US*, dan tidaklah berlaku polemik politik mencolok antara pihak pro dengan antipenyerahan menerusi *US*. Oleh sebab Ikhwan dan rakan-rakannya dalam *US* merupakan penentang tegar penyerahan Sarawak (*Utusan Sarawak*, 16 Januari 1949-13 November 1950), justeru akhbar ini tidaklah dapat membebaskan diri daripada pengaruh perjuangan antipenyerahan Sarawak dewasa itu. Hal ini merupakan lumrah persuratkhabar secara umumnya.

Pemilihan perkataan “*Fajar*” sejajar dengan kedudukan *FS* sebagai akhbar Melayu perjuangan yang pertama di Sarawak. Kalimah “*Fajar*” dipilih kerana simbolisme kelembutan cahayanya, penanda bermulanya kehidupan (bukan setakat hari) baharu. Justeru, kemunculan *Fajar Sarawak* dilihat sebagai perintis dan penadah harapan baharu buat puterabumi Sarawak. Pemilihan nama *US* jelas memperlihatkan pengaruh *UA*. Hanya sahaja, nama “Asas” (atau ASAS: Angkatan Semangat Anaknegri Sarawak) digantikan dengan “Sarawak” kerana perjuangan ASAS ialah untuk Sarawak (Nordi, 2003: Bab 2).

Tempoh penerbitan *US* lebih panjang berbanding *FS* dan *UA*. *US* diterbitkan kira-kira 22 tahun. Dalam tempoh 1949-1950 (misalnya), *US* diterbitkan sebanyak 99 keluaran (26 keluaran tidak dapat dikesani). Dengan sokongan marak daripada pembacanya, *US* diterbitkan sebagai akhbar mingguan dengan empat halaman bercetak. Ia berlaku tidak sampai

empat minggu penerbitannya. Pada mulanya, *US* diterbitkan sebagai akhbar dwibulanan seperti *FS* dan *UA* (*Utusan Sarawak*, 16 Januari 1949-13 November 1950).

Berbanding *FS* dan *UA*, edaran *US* ke negeri-negeri di Tanah Melayu tidak hanya tertumpu di Singapura sahaja. Berdasarkan iklan yang terdapat dalam *US*, edarannya meliputi bahagian utara dan pantai timur Tanah Melayu (namun, tidaklah mustahil *FS* dan *UA* turut diedarkan di negeri-negeri lain). *US* turut diedarkan ke Kalimantan. Ia terbukti melalui hubungan Ariff Press dengan majalah *Internasional* di Kalimantan. Bagi *US*, penyusunannya lebih teratur berbanding *UA*. Walaupun *US* tidak menyediakan halaman khas untuk berita luar negeri (disusun mengikut kesesuaian), tetapi *US* menyediakan ruangan khusus untuk berita dalam negeri. Namun, *FS* mempunyai ruangan khusus untuk berita dalam dan luar negerinya. *US* tidak menyediakan ruangan cerpen seperti *FS*, walaupun kedua-duanya turut menyediakan ruangan sajak (*Fajar Sarawak*, 1 Februari-16 Jun 1930).

FS dan *UA* memaparkan ungkapan kata-kata hikmah. Ia biasanya diletakkan di ruangan bawah halaman cetakan akhbar. Kata-kata hikmah yang dipilih bertujuan memberikan kesedaran (sajian mindawi) kepada pembaca, bukan semata-mata sebagai perhiasan. Pengolahannya menunjukkan kekreatifan pengarang *FS* dan *UA* untuk memanfaatkan setiap inci ruangan akhbar (*Fajar Sarawak*, 1 Februari-16 Jun 1930 dan *Utusan Asas*, 10 Oktober-15 Disember 1947). Terdapat petikan kata-kata hikmah yang dinyatakan sumbernya (bukanlah kesemuanya), selain petikan ayat al-Quran dan hadis. Sekalipun keunikan ini tidak diteruskan *US*, tetapi sebagai gantinya, terdapat sedutan kata-kata hikmah yang disisipkan melalui rencana-rencana terbitan *US* (*Utusan Sarawak*, 16 Januari 1949-13 November 1950).

Apabila diperhalusi, kedapatan perkaitan akrab antara *FS* dengan *UA* – yakni, jika kata-kata hikmah dan skop asal *UA* diletakkan dalam perspektif *FS*. Himpunan kata hikmah *UA* kebanyakannya berkait dengan kearifan ekonomi dan sosial: ringkas dan padat dengan rangkuman mesej progresif. Ia dapat memenuhi impian asal *UA* dalam aspek “*iktisad dan kebudayaan*”, jika direnung sejenak. Pemikiran progresisme dan Islam tetap diselitkan *UA* di sebalik gugusan kata-kata hikmahnya, sekali gus membayangkan *UA* tidak

pernah mengabaikan kedua-dua aspek ini dalam mandala perjuangannya. Gesaan *UA*, “Banyakkan kerja, sedikitkan berchakap” bertepatan dengan seruan *FS* supaya puterabumi Sarawak menentang segala spesies perangai syaitanisme yang bercanggah dengan gagasan kemajuan. Sejajar dengan seruan *FS* agar puterabumi bangkit dengan gigih dan tabah untuk berbakti kepada bangsa dan nusa, ini menepati ungkapan *UA*, “Kerajinan itu membawa kemajuan” dalam semua dimensi kehidupan (*Utusan Asas*, 10 Oktober 1947-1 Mei 1948).

Seterusnya, *FS* memuatkan rencana keagamaan, sejarah dan kesusasteraan. Rencana keagamaan dan sejarah kebanyakannya dipetik oleh *FS* daripada majalah luar negeri, terutamanya dari Indonesia dan Timur Tengah, tetapi tidak terdapat rencana keagamaan dan sejarah dalam *UA*. Begitu juga dengan karya sastera. Seperti dinyatakan tadi, fokus *UA* menjurus kepada isu politik. Dari segi reka bentuk, akhbar yang mewarisi citra *FS* ialah *US*. *UA* tidak sempat mewacanai isu ekonomi dan kebudayaan (akibat keterbatasan tempoh penerbitannya). Betapapun demikian, *ASAS* tetap bergagah diri untuk meneruskan penerbitan *UA* biarpun dalam keadaan serba kekurangan. Jika tidak ada rotan, akar pun berguna juga. Jika tidak dapat dikaut semua, janganlah dibuang semua. Keterbatasan ini telah ditebus sebaik-baiknya menerusi penerbitan *US*. Seperti yang dinyatakan, pengasas kedua-dua akhbar ini ialah Ikhwan. Beliau mengetuai sidang pengarang *UA* dan *US* dalam kesinambungan perjuangannya sebagai intelektual dan patriot Sarawak.

FS menempa pendekatan pragmatik dan selektif, lebih-lebih lagi apabila menegur regim Brooke dan pemimpin Melayu feudal. *FS* merunduk, bukan menanduk. Ada kalanya, teguran bernas *FS* terhadap pemimpin dan orang Melayu kedengaran agak pedih, pedas dan sinis. Berani kerana benar, takut kerana salah. Harapan *FS* jelas: akhbar ini nekad meninggalkan sentuhan yang bermakna terhadap jiwa dan pemikiran pembaca. *FS* mendekati pembacanya dengan manhaj mendidik, bukannya menghukum. Suaranya merayu, nadanya mendayu (*Fajar Sarawak*, 1 Februari-16 Jun 1930). *UA* dan *US* pula bergelut dalam gelanggang perang: dalam suasana zaman dekolonialisasi (pembebasan tanah-tanah jajahan Barat), demokrasi dan hak asasi manusia. Justeru, dwiakhbar Melayu ini menujahkan pendekatan agresif dan radikal. Alang-alang mandi, biarlah basah. Keberanian *UA* dan *US* bukanlah bersifat

semberono, sebaliknya dibekali dengan bukti dan hujah konstruktif (*Utusan Asas*, 10 Oktober 1947-1 Mei 1948; *Utusan Sarawak*, 16 Januari 1949-13 November 1950).

Kesemua akhbar ini menegaskan kemustahakan perubahan sikap positif dan amalan progresif sebagai miftah kemajuan diri, bangsa dan nusa. Gesaan *FS* terhadap pemimpin Melayu supaya mereka prihatin dengan nasib dan masa depan orang Melayu bertepatan dengan penegasan *UA* tentang keutamaan amalan “tulong dan bantu” sebagai “dasar meninggi mutu”. Malah, seruan perpaduan *FS* senada dengan peringatan *UA*, “Barangsiapa yang tidak mementingkan urusan bangsa, bukanlah dia daripada mereka”. Peringatan *UA*, “Gampang, kesudahannya ruboh” sejajar dengan pendirian *FS* bahawa prakarsa perubahan dan pembaharuan harus dilaksanakan secara tekal (*Fajar Sarawak*, 1 Februari-16 Jun 1930).

Jika dilihat seimbas lalu, pada zahirnya semacam tidak ada perkaitan antara *FS* dengan *UA*, namun pada hakikatnya, *UA* dan *FS* merupakan “saudara sedarah sedaging”. Perkaitan ini tidaklah menghairankan. Seperti yang dinyatakan, *FS* dan *UA* diasaskan oleh dua tokoh pengarang sehati sejiwa iaitu Johari Anang dan Abdul Rahman Kassim. Lantaran itu, perjuangan *UA* sebenarnya merupakan kesinambungan perjuangan *FS*. Kedua-duanya saling melengkapi, biarpun *FS* dan *UA* diterbitkan pada zaman, malah dalam suasana politik yang berbeza. Begitu juga dengan perkaitan antara *FS* dengan *US*. Kesemua akhbar Melayu ini berjihad atas landasan reformisme Islam dan nasionalisme progresif.

DUTA KEMERDEKAAN DAN DELEGASI KEMAJUAN

Perlu dinyatakan, pemerihalan terhadap sumbangan *FS*, *UA* dan *US* harus mengambil kira empat batasan: tempoh penerbitan akhbar, naskhah yang kekal, keseluruhan inti pati isi kandungannya dan suasana zaman yang melatari penerbitan akhbar. Cakupan sumbangan *FS* lebih meluas berbanding *UA* kerana *FS* menggarap aspek politik, ekonomi dan sosial. Dalam konteks perjuangan akhbar Melayu, *FS* mencetuskan bibit-bibit pemikiran antikolonialisme (*Fajar Sarawak*, 1 Februari-16 Jun 1930). Pemikiran ini diserlahkan *UA*. Menerusi *UA* dan *US* pula, pemikiran antikolonialisme

dipancarkan tanpa gusar dan gentar, sejajar dengan arus dekolonialisasi Barat di seluruh dunia (*Utusan Asas*, 10 Oktober 1947-1 Mei 1948; *Utusan Sarawak*, 16 Januari 1949-13 November 1950).

Dari aspek ekonomi, *FS* menyedarkan puterabumi Sarawak terhadap bahaya duri kemunduran dan racun kemiskinan. Saranan *FS* agar bangsanya aktif bermiaga, saling bantu-membantu dan menubuhkan syarikat perniagaan, bertujuan untuk menyedarkan kelalaian dan kelekaan masyarakat Melayu. Gesaan *FS* agar masyarakat Melayu bersatu padu turut mengesani jiwa dan pemikiran mereka. Bermakna, *FS* mampu berperanan sebagai agen perubahan dalam masyarakat, dengan menyebarkan idea-idea bernalas. Seterusnya, saranan *FS* agar masyarakat Melayu mementingkan pendidikan dan memajukan taraf pendidikan (*Fajar Sarawak*, 1 Februari-16 Jun 1930), mendorong kemunculan dan peningkatan sekolah-sekolah Melayu. Kesannya jelas pada dekad 1930-an dan selepasnya (Nordi, 2001: 8-30).

Berbanding *FS*, sumbangan *UA* lebih menyengat dalam aspek politik. *UA* memberikan sumbangan penting dalam menyedarkan rakyat tentang kebobrokan penjajahan. *UA* membongkar putar belit, tipu muslihat dan ugutan British dalam proses penyerahan Sarawak. Langkah ini bertujuan untuk membuka minda dan mata rakyat terhadap niat jahat tersembunyi pihak penjajah, namun terselindung di sebalik mulut manis dan muka temboknya, bertopengkan umpan pembangunan dan kemajuan. Dalam konteks Perang Dingin, *UA* mencuri perhatian pembacanya agar mereka peka dengan anarki dunia antarabangsa. *UA* menyedarkan rakyat tentang bahaya imperialism dan komunisme ke atas keamanan dunia sejagat (*Utusan Asas*, 10 Oktober 1947-1 Mei 1948).

Dari segi ini, *UA* membuka lembaran baharu apabila menekuni isu terorisme (kolonialisme dan komunisme) sejagat pasca-Perang Dunia II. Walaupun penerbitan *UA* begitu penting dalam konteks perjuangan politik yang getir ini, tetapi penerbitannya dihentikan kira-kira lima bulan. ASAS berhasrat menerbitkan akhbar yang lebih mantap dari aspek pengorganisasian dan perjuangannya. Penutupan *UA* membawa hikmah yang besar terhadap sejarah akhbar Melayu di Sarawak. ASAS menerbitkan *Utusan Sarawak* sebagai duta baharu perjuangannya. *US* mampu bertahan selama kira-kira 22 tahun.

Sumbangan *UA* dalam aspek pendidikan agak terbatas kerana fokus isunya ialah politik. *UA* tetap berusaha menyedarkan rakyat (khasnya masyarakat Melayu) terhadap kepentingan pendidikan dan ilmu sebagai obor kemajuan dan benteng maruah bangsa. *UA* menegaskan betapa pentingnya usaha berdikari untuk memajukan pendidikan anak negeri (*Utusan Asas*, 10 Oktober 1947-1 Mei 1948). Oleh itu, *UA* memberikan sokongan sepenuhnya terhadap usaha Barisan 338 menubuhkan sekolah rakyat. *UA* menggesa masyarakat Melayu agar menyokong kemajuan sekolah rakyat agar setanding dengan sekolah kerajaan, sekolah mualigh dan sekolah Cina. Peningkatan jumlah sekolah rakyat dan sambutan hangat daripada masyarakat Melayu terhadap sekolah rakyat sehingga 1950, sejajar dengan harapan *UA*. Pengasasan sekolah rakyat merupakan sumbangan penting Barisan 338 dalam aspek kemandirian pendidikan puterabumi patriotik dewasa itu (Nordi, 2001:8-30).

Sumbangan inklusif *US* merupakan kemuncak rangkaian perjuangan dalam sejarah akhbar Melayu di Sarawak, sejak awal 1930. *FS* bagaikan benih, *UA* bagaikan akar dan *US* bagaikan pohon. Antara sumbangan penting *US* (sekadar menyatakan beberapa contoh): kesediaan kerajaan kolonial British menambahkan bilangan pegawai bumiputera dalam *Senior Service*, menyegerakan pembayaran tunggakan gaji kepada Barisan 338, memperkuatkan pasukan polis dan memperketatkan kemasukan bangsa asing ke Sarawak untuk menyekat pengaruh komunisme, memperbaiki kelemahan pentadbiran kolonial dan menjamin keberkesanan Syarikat Kerjasama, menambahkan bantuan kewangan kepada sekolah rakyat dan sekolah Melayu, menurunkan harga beras dan menjual gula secara catuan – inilah antara sumbangan semerta *US* (Nordi, 2005:45-69).

Selain itu, atas kesedaran untuk memperbaiki taraf hidup anak negeri seluruhnya, Persatuan Kebangsaan Melayu Sarawak (PKMS) melancarkan 14 rancangan utama pada 10 Oktober 1949, sempena menyambut ulang tahun ke-10 penubuhannya. Ia merupakan usaha PMKS sebagai menyahut saranan bernas *US*. Senarai rancangan progresif dan inklusif PKMS merangkumi (*Utusan Sarawak*, 24 Oktober 1949):

1. Persatukan Bangsa Melayu lelaki dan perempuan seluroh Sarawak dengan satu tujuan.
2. Jaga dan peleharakan keselamatan Bangsa Melayu.
3. Galak dan tanamkan perasaan kebangsaan didalam hati Bangsa Melayu.
4. Tinggikan darjah pelajaran macham2 bagi lelaki dan perempuan.
5. Utamakan bahasa Melayu dan jadikan bahasa rasmi.
6. Pelehara dan jagakan perkara2 Igama Islam.
7. Perbaiki dan galakkan iktisad atau economy Melayu supaya darjah kehidupan jadi tinggi.
8. Hapuskan kebudayaan atau adat2 kuno dan hidupkan kebudayaan yang mendatangkan kemajuan.
9. Tentangkan fikiran pembesar2 yang mana tidak disatu oleh fikiran ramai.
10. Datangkan fikiran kapada Kerajaan atas jalan mendatangkan muslihat bangsa dan negara.
11. Ikhtiarkan sympaty sama sabangsa dan sa-Igama dalam dan luar negeri.
12. Jaga dan peleharakan nama perdirian Persatuan Kebangsaan Melayu.
13. Berbaik2 dan bekerjasama dengan bangsa penduduk Sarawak.
14. Jagakan kemerdekaan Sarawak dan perchayakan tidak ada siapa boleh merampasnya.

Dalam perkembangan berkaitan, tercerna kesedaran dan kegigihan untuk mengembangkan perniagaan Melayu, meneruskan kegiatan penenunan kain (batik Sarawak) dan pembukaan sekolah rakyat tanpa bantuan kerajaan kolonial British. Dalam pada itu, pengasasan Persatuan Pemuda Melayu Insaf merupakan hasil saranan *US* terhadap pemuda. Galakan *US* agar pemuda menceburi kegiatan penulisan berhasil apabila majalah *Kesedaran* diterbitkan pada 1950. Kritikan *US* terhadap sikap dan amalan boros, diberikan reaksi positif oleh PKMS. Hal ini menyebabkan PKMS bertindak tegas mencegah amalan boros (sebagai contohnya) dalam urusan kenduri kematian, bahkan bertambahnya penyertaan anak-anak bumiputera di pelbagai sekolah menunjukkan *US* berjaya menyedarkan pemerintah, pemimpin dan rakyat (Nordi, 2001:77-104).

Bagaimanapun, segala sesuatu ada batasannya. Sehingga 1950, gagasan politik termahal *US* (malah, tidak diabaikan gagasan politik *UA*),

iaitu mendakap semula kemerdekaan Sarawak secara keperlembagaan (mengikut lunas keamanan, undang-undang dan prinsip demokrasi) masih belum tercapai. Masalah perpecahan politik Melayu antara golongan anti dan propenyerahan Sarawak, terus menemui jalan buntu kerana persengketaaan politik ini membabitkan ketegangan dalam urusan umat dan agama (Islam). Desakan *US* agar kerajaan kolonial British memajukan sektor pertanian padi (agar tidak bergantung dengan beras import) dan menghasilkan tanaman makanan sendiri, nyatahah tidak dilaksanakan. Tahap ekonomi dan pendidikan puterabumi di seluruh negeri masih mendukacitakan (*Utusan Sarawak*, 16 Januari 1949-13 November 1950). *US* tidak berputus harapan, jauh sekali berputus asa. *US* terus bersemangat waja untuk menyedarkan rakyat agar memperbaiki diri dan memajukan taraf hidup puterabumi agar setanding dengan bangsa-bangsa asing. Gagasan dan gerakan progresif ini merupakan rantaian perjuangan *FS* dan *UA*.

FS dan *US* memberikan sumbangan penting terhadap pencerahan mengenai tasawur Islam (konsepsi Islamik) secara syumul. Islam mendapat tempat yang istimewa dalam *US* apatah lagi *FS* kerana Haji Muhammad Daud Abdul Ghani, antara pengasas dan pengarang *FS*, merupakan ulama' Sarawak yang tersohor. *FS* dan *US* gigih menyedarkan umat Islam di Sarawak tentang hakikat Islam sebagai acuan dan landasan hidup yang sempurna. *FS* dan *US* menegaskan Islam merupakan perisai kemiskinan dan penebus kehinaan. *FS* dan *US* menggesa agar umat Islam kembali kepada al-Quran dan Sunnah untuk mencapai kejayaan dunia dan kebahagiaan akhirat (*Fajar Sarawak*, 1 Februari-16 Jun 1930; *Utusan Sarawak*, 16 Januari 1949-13 November 1950).

Islam ialah agama untuk dunia dan agama untuk akhirat. Sikap perlu diubah, pemikiran harus berubah. Di sinilah terhunjamnya akar-makar perubahan, seperti didakwahkan oleh triakhbar Melayu. Kesemuanya ini menuntut pengorbanan (masa, tenaga, fikiran dan wang). Inilah antara gagasan formulatif dan definatif *FS* yang diteruskan *US*, berneracakan ajaran syumul Islam. Di pihak *UA* pula, perjuangannya menentang penjajahan (perhambaan sesama manusia) menepati ajaran vitalistik Islam (*Utusan Asas*, 10 Oktober-15 Disember 1947), seiring dengan perjuangan *FS* dan *US*, Islam ialah agama keadilan, persaudaraan dan persamaan. Islam merupakan rahmat untuk seluruh alam.

Sumbangan konstruktif *FS* dapat dikesan menerusi seruan keramat *FS*, “Fajar telah tersingsing. Bangkitlah wahai bangsaku” – akhirnya membawa puterabumi Sarawak ke medan perjuangan politik antikolonialisme secara terbuka, bukan lagi di sebalik tabir, bukan pula dengan suara lunak dan madah berlapik. Hal ini bertepatan dengan motto *UA* iaitu “Raayat Yang Mengetahui Ialah Keselamatan Negara”. Paling menarik, seruan *FS* dan motto *UA* tadi dapat dirangkumkan dengan motto *US*, “OLEH RA’AYAT UNTOK RA’AYAT” kerana perjuangan *FS* dan *UA* turut dijuruskan demi kepentingan seluruh rakyat (puterabumi) Sarawak. Ia merupakan manifestasi ikrar ikhlas *FS*, *UA* dan *US* untuk berbakti dan berbudi kepada agama, bangsa dan nusa. Sehubungan dengan itu, isu dan persoalan yang menggamt perhatian ketiga-tiga akhbar ini jelas berlegar-legar dalam kerangka gagasan Islam dan nasionalisme progresif: bersatu memperislah kemunduran hidup duniawi, bersatu mempersiah penjajahan Barat dan bersatu memperkuuh silaturahim Islam. Berani menebang berani memikul.

Di samping itu, sumbangan penting *US* dan *UA* dapat ditelusuri dalam konteks wacana mengenai gagasan keamanan sejagat. Hal ini memberikan ruang kepada pembaca kedua-dua akhbar ini untuk memprihatini pergolakan politik dunia semasa secara dekat (*Utusan Asas*, 10 Oktober-15 Disember 1947; *Utusan Sarawak*, 16 Januari 1949-13 November 1950). Sebaliknya, *FS* kurang memberikan ulasan (kecuali terhad bilangannya) terhadap perkembangan isu politik antarabangsa kerana fokus *FS* ialah isu dalam negeri. Namun, segmen berita luar negeri dalam *FS* tetap memperlihatkan kepekaannya terhadap perkembangan semasa dunia luar. Oleh itu, *UA* bukanlah akhbar Melayu pertama yang menyalurkan berita dan perkembangan luar negeri. Peranan ini telah dirintis *FS* (*Fajar Sarawak*, 1 Februari-16 Jun 1930).

FS dan *UA* tidaklah mampu memberikan kesan masif dalam perjuangannya kerana tempoh penerbitannya yang singkat, bahkan *US* pun tidak dapat memberikan kesan revolusif, namun ini tidaklah bermakna sesiapa pun berhak meremehkan sumbangan mereka biarpun kecil. Berat mata memandang, berat lagi bahu memikul. Perjuangan ini merupakan amanah yang berat dan gerak kerja yang rumit. Dengan ini, menerusi seruan dan gesaannya, *FS* sentiasa menuntut sokongan daripada semua pihak: Brooke, pemimpin, hartawan, cerdik pandai dan orang Melayu (*Fajar Sarawak*, 1

Februari-16 Jun 1930). Cabaran *UA* dan *US* lebih getir kerana dwiakhbar ini menentang pemerintah iaitu kerajaan kolonial British dan pembesar Melayu propenjajah (*Utusan Asas*, 10 Oktober 1947-1 Mei 1948; *Utusan Sarawak*, 16 Januari 1949-13 November 1950).

Dalam pada itu, sumbangan dalam ranah penebusan maruah puterabumi tidaklah harus diabaikan. Hidup ialah maruah. Tanpa maruah, hidup tidaklah bernilai. Sebelum *FS* diterbitkan, puterabumi Sarawak tidak mempunyai akhbar, walhal akhbar Inggeris dan Cina telah diterbitkan jauh lebih awal di Sarawak. Di Tanah Melayu dan Indonesia, perkembangan persuratkhabaran Melayu bermula sejak abad ke-19 lagi (Nordi, 2003). Puterabumi Sarawak semakin ketinggalan dalam arus perjuangan dan kebangkitan Melayu. Oleh itu, apabila *FS* berjaya diterbitkan, ia merupakan suatu penebusan maruah untuk puterabumi Sarawak. Begitu juga dengan penerbitan *UA* dan *US*.

FS dan *US* bersikap kritis terhadap tamadun materialisme dan sekularisme Barat. Mereka menggunakan sejarah dan tamadun Islam sebagai sumber inspirasi kemajuan umat Islam pada zaman moden (*Utusan Sarawak*, 16 Januari 1949-13 November 1950). Malah, *FS* pernah menyentuh peranan dan sumbangan penting tamadun Islam terhadap kemajuan Barat, dan inilah bukti keunggulan peradaban umat Islam ketika menerajui kemajuan dunia lebih 500 tahun lamanya (*Fajar Sarawak*, 1 Februari-16 Jun 1930). Semangat dan kesedaran inilah yang diterapkan *FS* dan *US*. *FS* merupakan wahana terawal yang membuka mata hati umat Islam di Bumi Kenyalang tentang hakikat kesejarahan ini. Manusia tanpa sejarahnya bagaikan jasad tanpa rohnya.

Seterusnya, hampir keseluruhan pengisian *UA* dan sebahagian besar halaman *US* diolah berpaksikan tema politik. Hal ini memperlihatkan keazaman politik *UA* dan *US* untuk memantapkan dan memperluas sokongan rakyat melalui ketajaman mata pena. Ia bertepatan dengan tujuan utama pengasasan ASAS (menentang dasar dan kegiatan penjajahan British). ASAS ibarat nyawa, *UA* menjadi senjatanya. Tanpa *UA* dan *US*, perjuangan antipenyerahan Sarawak dicengkam kebisuan, namun kebisuan ini berjaya ditamatkan dengan penerbitan sulung *UA* dan penerbitan bersejarah *US*. Di sinilah terletaknya kepentingan sumbangan politik *UA* dan *US*, dalam konteks

perjuangan kemerdekaan Sarawak sehingga murahnya tidak dapat dijual, mahalnya tidak dapat dibeli.

Seperti dinyatakan tadi, isu penyerahan Sarawak semakin luntur sejak awal 1950-an, khasnya selepas pembunuhan Duncan Stewart di Sibu pada 3 Disember 1949 (Nordi Achie, 2018). Sumbangan politik *US* sebagai jurubicara perjuangan antipenyerahan Sarawak beransur-ansur suram, namun harus diingat, semangat dan cita-cita kemerdekaan terus menyala dalam jiwa dan bersemarak dalam pemikiran patriot Sarawak. Sumbangan *FS*, *UA* dan *US* dalam membangkitkan kesedaran progresif (membasmi bahaya kemunduran, menyemai baja kemajuan) tidaklah dapat dinafikan lagi. *US* bukan sekadar menajamkan gergaji perjuangan *UA*, bahkan *US* menggali semula mutiara perjuangan *FS*. Justeru, selain berperanan sebagai katalis propaganda *UA*, *US* turut berperanan sebagai kabel perjuangan *FS*.

KESIMPULAN

Sepanjang dua dekad ini, kegigihan puterabumi Melayu Sarawak menerbitkan *FS*, *UA* dan *US* sebagai semboyan suara hati dan cetusan fikiran bernes, merupakan prakarsa murni yang membanggakan anak watan, khasnya dalam konteks sejarah dan perjuangan keulamaan. Mereka telah mencipta sejarah, lebih-lebih lagi merentasi zaman dekadensi dunia Melayu-Islam dewasa itu. Kerencaman tema (isu dan persoalan) sezaman yang diwacanai *FS*, *UA* dan *US* mempunyai perkaitan dan perkalian tertentu, sementelahan menyusuri perkembangan (rangkuman gagasan dan rangkaian gerakan) dalam mandala perjuangan ketiga-tiga akhbar Melayu ini. *FS*, *UA* dan *US* memacu puterabumi Sarawak merentasi dwizaman yang berbeza, berpaksikan gerakan dan gagasan tiga serangkai, dalam atmosfera perjuangan keulamaan secara kohesif, melewati tempoh dua dasawarsa (1930-1950). Dwidasawarsa ini merupakan tempoh yang kritikal dalam lembaran sejarah Sarawak. Inilah “zaman pergolakan” dan demikianlah “zaman perjuangan”. Zaman getir ini memberikan kesempatan emas dan cabaran pahit buat seluruh patriot Melayu, untuk mengisi perjuangan bersejarah ini melalui persuratkhabar dengan semangat reformisme Islam dan nasionalisme progresif.

NOTA

¹ Kertas ini dibentangkan dalam CIMS 2021: Conference on International Union for Muslim Scholars in Socio-Politics, 24-25 Februari 2021, Fakulti Pengajian Islam, Universiti Kebangsaan Malaysia (UKM), Bangi.

RUJUKAN

Fajar Sarawak. 1 Februari-16 Jun 1930.

Nordi Achie. (2001). Kemunduran ekonomi bumiputera Sarawak di bawah pemerintahan Kolonial British 1946-1950: Satu tinjauan khusus berdasarkan *Utusan Sarawak* 1949-1950. *Purba*, 20, 49-85.

Nordi Achie. (2001). Kemunduran pendidikan masyarakat Melayu di Sarawak pada awal pemerintahan Kolonial British 1946-1950: Satu tinjauan dari perspektif *Utusan Sarawak* 1949-1950. *Malaysia Dari Segi Sejarah*, 29, 8-30.

Nordi Achie. (2001). Masyarakat Melayu-Muslim di Sarawak, 1946-1950: Satu tinjauan dari perspektif golongan terpelajar Melayu. *Malaysia Dari Segi Sejarah*, 29, 77-104.

Nordi Achie. (2002). Perpecahan masyarakat Melayu di Sarawak dalam konteks isu penyerahan, 1946-1950. *Purba*, 21, 46-73.

Nordi Achie. (2003). Pemikiran Ikhwan Zaini terhadap anarki politik antarabangsa, 1946-1950. *Malaysia Dari Segi Sejarah*, 31, 165-188.

Nordi Achie. (2005). Dasar dan kesan pentadbiran Kolonial British di Sarawak 1946-1950: Satu penelitian terhadap kritikan Ikhwan Zaini. *Manu*, 10, 45-69.

Nordi Achie (2003). *Akhbar Melayu perjuangan di Sarawak*. Kuala Lumpur: Penerbit Universiti Malaya.

Nordi Achie (2013). *Kolonialisme dan Kristianisasi Melayu di Sarawak, 1850-1950*. Kota Kinabalu: Penerbit Universiti Malaysia Sabah.

Nordi Achie (2018). *Rosli Dhoby dan Rukun 13*. Kuala Lumpur: Penerbit Universiti Malaya.

Nordi Achie. (2018). Analisis tipologi Pra-PRU-14 di Sabah: Karakter kosmetik dan komentar kritis. *Kinabalu*, 14, 223-242.

Nordi Achie. (2020). Pemikiran propagandikal Syiah Imamiah: Resensi kritis terhadap *Syiah Sebenar-benarnya Ahlu Sunah Nabi*. *Kinabalu*, 26, 1-15.

Nordi Achie. (2020). Rumas Limas Rumah Pusaka. *Kinabalu*, 26, 205-208.

Utusan Asas. 10 Oktober-15 Disember 1947.

Utusan Sarawak. 16 Januari 1949-13 November 1950.